



■ SERI Paduka Baginda Yang di-Pertuan Agong diperkenalkan kepada menteri-menteri kabinet Indonesia dan orang-orang kenamaan. Turut mengiringi Baginda ialah Presiden Suharto dan Naib Presiden Indonesia, Tun Adam Malik (kiri). — Gambar Berita Harian.

Titah Seri Paduka di jamuan kenegaraan 'Asas kukuh kestabilan negara Asean'

KUALA LUMPUR, Jumaat — Yang di-Pertuan Agong malam ini bertitah kerjasama dua hala di antara Malaysia dengan Indonesia merupakan asas yang kukuh bagi kestabilan negara-negara Asean.

Titahnya, kestabilan itu merupakan faktor terpenting bagi menentukan pembangunan ekonomi dan sosial serta ketahanan serantau demi menjamin masa depan bersama.

Baginda bertitah demikian di jamuan makan malam kenegaraan di Istana Merdeka di Jakarta. Titah ucapan baginda telah di keluarkan di sini.

Asean, titah baginda sedang mendapat perhatian dunia sebagai satu pakatan yang sangat berpengaruh dan kedudukan tersebut akan meningkat jika kedua-dua negara bekerjasama bagi memajukannya.

Yang di-Pertuan Agong juga menyatakan Malaysia sentiasa mengikuti perkembangan pembangunan di Indonesia serta tertarik hati

dengan kejayaan pesat republik tersebut.

Baginda juga yakin bahawa republik tersebut akan mencapai kemajuan yang lebih cemerlang demi kesejahteraan rakyat, kestabilan negara seterusnya ketahanan serantau.

Terdahulu dari itu baginda telah menyatakan rasa bangganya atas keceratan persaudaraan di antara kedua negara yang jelas menyeluruh di kalangan para pemimpin serta rakyat jelata.

Beberapa forum antara kedua negara termasuk kegiatan membasmi anasir-anasir komunis, mengamankan jenayah dan keganasan di perbatasan dan perairan juga sedang berjalan lancar.

Baginda berharap pertalian yang sedia wujud di antara kedua negara dipertingkatkan demi kepentingan serta ketahanan kedua-dua negara.

Presiden Suharto dalam ucapannya pula berkata hubungan persaudaraan di antara Malaysia dengan Indonesia perlu dipelihara dan diperkuatkan lagi supaya dapat membangunkan masyarakat yang lebih maju di rantau ini.

Ketika berucap di jamuan negara sempena lawatan yang di-Pertuan Agong dan Raja Permaisuri Agong serta rombongannya ke Indonesia, Presiden Suharto menambah persaudaraan merupakan kunci penting bagi kebahagiaan dan ketenteraman di rantau Asean.

Katanya, rakyat Indonesia merasa mendapat kehormatan atas kunjungan Seri Paduka Baginda ke Indonesia.

"Dewasa ini kita menyaksikan dan merasakan hubungan yang sangat erat dan mendalam di antara kedua bangsa dan negara.

Menurut beliau hubungan baik di antara Malaysia dengan Indonesia terjalin berkat adanya hubungan peribadi yang terus menerus di antara kedua kepala pemerintah, para menteri, pegawai-pegawai kerajaan dan kalangan masyarakat di kedua pihak.

Bahan asal dari Arkib
Negara Malaysia